


## Janji Allah kepada hamba-Nya yang berdoa



**M**ARILAH kita bertaqwa kepada Allah Subhanahu Wata'ala dengan sebenar-benar taqwa, melaksanakan segala perintah-Nya dan menjauhi segala larangan-Nya. Sentiasalah kita berpegang teguh dengan ajaran Al-Quran dan mengikuti Sunnah Rasulullah Sallallahu Alaihi Wasallam. Mudah-mudahan kita menjadi insan yang berjaya, selamat dan bahagia di dunia dan di akhirat. Firman Allah Subhanahu Wata'ala dalam Surah Al-Baqarah Ayat 186 yang tafsirannya :

"Dan apabila hamba-hamba-Ku bertanya kepadamu wahai Nabi Muhammad mengenai Aku maka katakanlah kepada mereka : Sesungguhnya Aku (Allah) sentiasa hampir kepada mereka. Aku memperkenankan permohonan orang-orang yang berdoa apabila dia berdoa kepada-Ku. Maka hendaklah mereka menyetujui seruan-Ku dengan mematuhi perintah-Ku dan hendaklah mereka beriman kepada-Ku supaya mereka sentiasa berada dalam keberanan."

Sebagai hamba Allah Subhanahu Wata'ala, kita sentiasa mengharapkan rahmat, kerediaan, kemampuan dan pertolongan daripada-Nya. Adapun antara cara untuk mendapatkan ialah melalui doa. Sesungguhnya doa bererti permintaan atau permohonan dan luahan hasrat hati seorang hamba kepada Allah Subhanahu Wata'ala untuk menyatakan sesuatu hajat lebih-lebih lagi ketika ditimpa ujian dan dugaan.

Perlu diingat, berdoa itu hendaklah dilakukan pada setiap masa dan keadaan, lebih-lebih lagi pada waktu ketika kita sedang sihat dan senang kerana dengan cara itu apabila kita berdoa pada waktu susah, doa akan mudah diperkenankan oleh Allah Subhanahu Wata'ala. Daripada Abu Hurairah Radhiallahu Anhu, Rasulullah

Sallallahu Alaihi Wasallam bersabda yang bermaksud :

"Sesiapa suka supaya dimakbulkan doanya oleh Allah pada waktu kesulitan dan kesusahannya, maka hendaklah dia memperbanyakkan doa pada waktu senang."

Ketahuiilah, doa adalah satu ibadat dan sebagai tanda keimanan dan keyakinan kita bahawa tiada tempat untuk mengadu, memohon atau meminta pertolongan dan perlindungan selain daripada Allah Subhanahu Wata'ala sahaja. Daripada Al Nu'man bin Basyir beliau berkata : Aku mendengar Rasulullah Sallallahu Alaihi Wasallam bersabda yang maksudnya :

"Doa itu adalah ibadat, kemudian Baginda membaca dan Tuhan kamu berfirman : Berdoalah kamu kepada-Ku nescaya Aku perkenankan doa permohonan kamu. Sesungguhnya orang-orang yang sombong takbur daripada beribadat dan berdoa kepada-Ku, akan masuk neraka jahanam dalam keadaan hina." (Diriwayatkan Al-Imam At-Tarmizi).

Daripada Abu Hurairah Radhiallahu Anhu, Rasulullah Sallallahu Alaihi Wasallam bersabda yang bermaksud :

"Tidak ada sesuatu (zikir dan ibadat) yang lebih mulia di sisi Allah Subhanahu Wata'ala daripada doa." (Diriwayatkan Al-Imam At-Tarmizi).

Sesungguhnya doa mempunyai kedudukan yang mulia di sisi Allah Subhanahu Wata'ala. Oleh itu, kita dituntut untuk membacanya dengan beradab. Antara adab-adabnya ialah kita disunatkan berwuduk, menghadap kiblat, memulakan dan mengakhiri doa dengan memuji nama Allah Subhanahu Wata'ala serta membaca selawat dan salam kepada Rasulullah Sallallahu Alaihi Wasallam, merendahkan diri dan suara, menadahkan kedua tangan, khushyuk dan berdoa dengan penuh harapan serta berasa yakin bahawa doa kita akan dimakbulkan oleh Allah Subhanahu Wata'ala.

Selain itu, terdapat juga beberapa waktu yang tepat dan tempat yang sesuai, jika kita berdoa maka doa itu akan mudah dan cepat dimakbulkan. Antaranya ialah pada satu pertiga malam, pada malam Jumaat dan hari Jumaat, selepas menunaikan sembahyang fardu, ketika sujud dalam sembahyang, waktu antara azan dan iqamah, ketika khatib duduk antara dua khutbah, dalam bulan Ramadan, Hari Arafah dan sebagainya. Manakala antara tempat yang mustajab untuk berdoa ialah di Masjid Haram, Masjidil Nabawi dan Masjidil Aqsa.

Ketahuiilah, Allah Subhanahu Wata'ala telah berjanji di dalam Al-Quran untuk memakbulkan dan memperkenankan permohonan doa hamba-hamba-Nya bahkan Allah Subhanahu Wata'ala malu jika menolak permintaan hamba-

hamba-Nya dengan tangan yang kosong. Daripada Salman Al-Parisi, Rasulullah Sallallahu Alaihi Wasallam bersabda yang maksudnya :

"Sesungguhnya Tuhan kamu Tabaraka Wata'ala pemalu lagi pemurah, Dia malu kepada hamba-Nya apabila (berdoa) mengangkat kedua tangan memohon kepada-Nya, dan mengembalikan kedua tangannya dengan tidak memberikannya apa-apa (Daripada rahmat-Nya)." (Riwayat Al-Imam Abu Daud).

Ketika berdoa, janganlah kita terburu-buru mengharapkan supaya doa kita cepat dikabulkan. Seandainya doa kita belum dimakbulkan, janganlah kita berputus asa untuk terus berdoa memohon kepada-Nya kerana setiap doa dan permohonan kita sama ada cepat atau lambat insyaAllah, pasti akan diperkenankan. Daripada Abu Hurairah Radhiallahu Anhu bahawa Rasulullah Sallallahu Alaihi Wasallam bersabda yang maksudnya :

"Tiada seseorang yang memohon kepada Allah dengan satu doa melainkan dimakbulkan untuknya, sama ada disegerakan permohonannya itu di dunia, dan sama ada disimpang permohonannya itu di akhirat, dan sama ada diampunkan dia daripada dosa-dosanya dengan kadar yang dipohonkan, selagi dia tidak memohon perkara dosa atau memutus silaturahmi atau tergesa-gesa (Untuk memakbulkan doanya). Mereka berkata, Wahai Rasulullah! Bagaimana tergesa-gesa itu?" Baginda bersabda : Dia berkata : "Aku berdoa kepada Tuhanmu namun Dia tidak memakbulkan untukku."

Selain itu, hindarkanlah diri kita daripada menzalimi dan menganiaya orang lain kerana doa orang yang dizalimi itu adalah mustajab. Daripada Ibnu Abas Radhiallahu Anhu Rasulullah Sallallahu Alaihi Wasallam berpesan kepada Mu'az bin Jabal ketika baginda mengutusnyanya ke Yaman yang maksudnya :

"Dan takutlah doa orang yang dizalimi, kerana tidak ada hijab (penghalang) antara ia dengan Allah."

Berdoa bukanlah hanya untuk diri sendiri sahaja bahkan kita juga dituntut untuk mendoakan orang lain, terutamanya ibu bapa, anak-anak, ahli keluarga, saudara mara, Muslimin dan Muslimat sama ada yang masih hidup ataupun yang telah meninggal dunia.

Sesungguhnya ibu bapa adalah orang yang paling utama untuk didoakan oleh anak-anak, lebih-lebih lagi apabila keduanya telah meninggal dunia. Ini adalah bagi membalas jasa mereka kerana telah memelihara dan mendidik kita sewaktu kecil. Malah penjagaan mereka terhadap anak-anak itu berterusan sehingga dewasa, tiada penghujungnya. Begitu juga halnya dengan ibu bapa, mereka digalakkan supaya mendoakan

anak-anak mereka. Daripada Abu Hurairah Radhiallahu Anhu bahawa Rasulullah Sallallahu Alaihi Wasallam bersabda yang bermaksud :

"Sesungguhnya diangkat darjat seseorang hamba di dalam Syurga, lalu dia berkata : "Dari mana (Saya memperoleh darjat) ini? "Maka dia katakan padanya : "(Ianya) daripada doa permohonan keampunan yang dilakukan oleh anakmu." - (Riwayat Ibnu Majah).

Perlu diingat dan difahami bahawa tujuan kita berdoa itu antaranya ialah untuk memohon rahmat, keberkatan dan keampunan daripada Allah Subhanahu Wata'ala. Akan tetapi, terdapat segelintir daripada masyarakat kita yang bersikap cuai, tidak bersungguh-sungguh dan kurang mengambil berat dan perhatian akan amalan berdoa. Begitu juga halnya setelah selesai mendirikan sembahyang berjemaah, terutamanya ketika mendirikan sembahyang berjemaah di masjid-masjid, terdapat segelintir orang yang terus berdiri dan beredar tanpa berdoa terlebih dahulu.

Alangkah ruginya mereka yang tidak ikut serta berdoa kerana di dalam doa yang dibacakan itu lazimnya mengandungi permohonan untuk mendapatkan keampunan, rahmat, keberkatan, kesejahteraan, kesihatan, keselamatan, memohon perlindungan untuk diri dan keluarga dari mara bahaya, bencana dan sebagainya. Oleh itu, apabila doa dibacakan kita hendaklah menghormatinya, meluangkan sedikit masa dengan mendengarnya dan memberi perhatian dengan penuh khushyuk. Bukannya melakukan perkara-perkara lain seperti bercakap-cakap, bergurau senda, menggunakan telefon bimbit dan sebagainya.

Akhirnya, marilah kita sama-sama memperbanyakkan membaca doa pada setiap masa dan keadaan, baik di kala senang mahupun susah, di kala kaya ataupun miskin dan percayalah janji Allah Subhanahu Wata'ala yang akan memperkenankan doa permohonan bagi sesiapa yang memohon kepada-Nya. Semoga kita tidak tergolong di kalangan orang-orang yang menyombongkan diri kepada Allah Subhanahu Wata'ala kerana tidak berdoa kepada-Nya. Mudah-mudahan segala amal ibadat dan doa-doa yang kita lakukan dan panjatkan diterima dan dimakbulkan oleh Allah Subhanahu Wata'ala. Amin Ya Rabbal Alam.

Firman Allah Subhanahu Wata'ala dalam Surah Ghafir Ayat 60 yang tafsirannya :

"Dan Tuhan kamu berfirman : "Berdoalah kepada-Ku nescaya Aku memperkenankan doa kamu. Sesungguhnya orang-orang yang menyombongkan diri daripada beribadat kepada-Ku akan masuk neraka jahanam dalam keadaan hina."

## Pupuk graduan cintai Al-Quran

Berita dan Foto :  
Dk. Siti Redzaimi Pg. Haji Ahmad

**BANDAR SERI BEGAWAN**, Khamis, 8 Ogos. - Majlis Khatam Hafaz 30 Juz Al-Quran graduan Diploma 'Aliyah Qiraat Sesi Pengajian (2016 - 2019) sempena Hafut Takharruj Kali Ketujuh Institut Tahfiz Al-Quran Sultan



DOA Khatam dibacakan oleh salah seorang bakal graduan Diploma 'Aliyah Qiraat institut berkenaan, Awangku Mohammad Jamilul Alam bin Pengiran Haji Mohammad Tejudin.

Haji Hassanul Bolkiah (ITQSHHB) diadakan di Dewan Persidangan, Pusat Da'wah Islamiah, di sini.

Hadir selaku tetamu kehormat, Rektor Universiti Islam Sultan Sharif Ali (UNISSA), selaku Ahli lembaga ITQSHHB, Dr. Haji Norarfan bin Haji Zainal.

Turut hadir, Pegawai-pegawai Kanan Kementerian Hal

Ehwal Ugama, pegawai-pegawai, pensyarah-pensyarah, guru-guru juga ibu bapa para bakal graduan Program Diploma 'Aliyah Qiraat yang diraikan.

Majlis dimulakan dengan bacaan Surah Al-Fatihah yang dipimpin oleh tetamu kehormat, diikuti dengan bacaan surah-surah lazim oleh Graduan Diploma 'Aliyah Qiraat yang diraikan.

Kemudian majlis diikuti dengan bacaan Takhtim oleh siswa Diploma 'Aliyah Qiraat ITAQSHHB Tahun 1 dan 2.

Sementara bacaan Doa Khatam dibacakan oleh salah seorang bakal graduan Diploma 'Aliyah Qiraat institut berkenaan, Awangku Mohammad Jamilul Alam bin Pengiran Haji Mohammad Tejudin.

Majlis turut diserikan dengan Dikir Marhaban oleh siswa-siswi Diploma 'Aliyah Qiraat ITAQSHHB Tahun 1 dan 2.

Pada majlis itu juga,



REKTOR Universiti Islam Sultan Sharif Ali (UNISSA), selaku Ahli lembaga ITQSHHB, Dr. Haji Norarfan bin Haji Zainal (kanan) memimpin bacaan Surah Al-Fatihah.

penyampaian sijil khatam hafaz disampaikan oleh tetamu kehormat, diikuti dengan Sayyidul Istighfar dan Selawat Tafrijiyyah. Bagi memberkati majlis, bacaan Doa Selamat dibacakan oleh Pensyarah Diploma 'Aliyah Qiraat ITAQSHHB, Awang Yusairi bin Asbol.

Antara tujuan majlis diadakan bagi memupuk semangat graduan agar sentiasa mencintai dan menghayati Al-Quran juga ajaran

agama Islam, selain melatih para graduan agar lebih berselesa bagi mendapatkan kerediaan daripada Allah Subhanahu Wata'ala dan dipermudahkan dalam melakukan segala pekerjaan.

Majlis Khatam 30 Juz Al-Quran graduan Diploma 'Aliyah Sesi Pengajian 2016 - 2019 itu adalah salah satu acara iringan bersempena Hafut Takharruj Ketujuh institut berkenaan.